

B. N. C.  
FIRENZE  
1065  
9



XV  
ET RPR  
603

1065.9

1065

9

T

**T H E S E S**  
*E X V N I V E R S A*  
**MEDICINA SELECTÆ,**

In Templo D. Caroli discutiendæ

Q V A S

*S E R E N I S S I M O*

**FRANCISCO II.**

MVTINÆ, REGGII &c. DVCI.

**IACOBVS FERRARIVS**

D. D. D.



MVTINÆ,

Typis Hæredum Cassiani 1683. *Superiorum Permissu.*





## D V X S E R E N I S S I M E .

**Q**uoniam in litteraria palestra non minus quam in *Isionomachia*, Dux Serenissime, per antiqua viget consuetudo sibi aliquem assumendi Patronum, sub cuius tutela, & auspicio pugna proximè accinctus, & galeatus arenam ingredietur, mihi non admodum laborandum fuit circa huiusmodi Patroni delectum, qui in hoc genere pugna Victoriā solo nomine auspicaretur. Tu enim primò occurristi Principum Decus, & Ornamentum, ad cuius adspectum cum tot doctissimis Viris, Hippocratica dogmata propugnaturus, quamvis satis imparem congressum suscipere non vererer. Cur enim timeam huic certamini me committere, cum in Philosophica arena duobus ante hac annis, te auspice, satis feliciter evaserim? Cur sub Estensium Aquilarum umbra litterarum cultoribus ad tot secula adeo

4  
familiari , hanc aleam experiri non liceat ?  
Sub tuo auspiciatissimo nomine iacta sunt huius  
Lycei fundamenta , tua effecit providentia , ut  
studiosa Iuventus in ipso Parentum sinu quam-  
cumque nobiliorem disciplinam sibi possit satis  
commode comparare , adeo ut quisque suam cul-  
pet socordiam , nisi quam citissime in Virum  
doctum emergat ; de tua bonitate Virgilianum  
illud pronunciari potest.

——— Hæc nobis Deus otia fecit .

Me igitur quam libenter in hoc Theatro Celsi-  
tudini tua spectaculum præbeo , expectans in-  
terim ( sed tua beneficentia munere , quando  
hanc Spartam adornare cepisti ) in hoc ipso Ly-  
ceo Doctoralem lauream , certus quamcumque  
aliam respuere , quam non offerat Mutinense  
Athenæum . Vale .

Celsitudinis tuae Serenissima

Humil. & Obseq. Servus, & Subditus

Iacobus Ferrarius .

Medi-





## I.



Medicina Artis nomine à Diuino Præceptore nuncupata, meritò a numero Scientiarũ excluditur, tum quoad partem speculatiuam, tum quoad practicam; quamuis re vera, hæc medicinæ diuisiò in Praxim, & Theoriam non subsistat, cum omnia in hac Arte, sint practica.

## I. I.

Rædè definitur ab Hippocrate Medicina, quod sit Adiectio, & Detractio; si tamen placeat aliqua diffusior definitio, non incongrua erit ista, quam affert doctissimus Hoffmanus. Medicina est facultas perspicendi quidquid in quaq; egritudine, comprehensa latitudine Sanitatis excogitari potest idoneum ad sanandum.

## I. I. I.

Solum corpus humanum est Artis huius subiectum, non omne egrum, & sanabile, & hoc ad excludendum a

Medicina Artem Veterinariam, cum humanum corpus vel quatenus sanabile, vel morbis obnoxium, non sit medicinæ subiectum sed solum sub tota latitudine Sanitatis consideratum. Differt tamen subiectum medicinæ à ceterarum Artium subiectis, quod non solum sit passivum, sed etiam activum; Quare prorsus intolerabilis, est nonnullorū lactantia, qui sanationes morborū suæ solertiæ, & suis Panaceis adscribunt, cum re ipsa primæ partes debeantur Naturæ, & vix secundæ Medico.

### I I I I.

**F**inis medicinæ, quatenus est habitus practicus, communiter quidem statuitur quod sit sanitas vel conservanda, vel recuperanda, sed malè; nam nisi alter præstantior finis assignetur, valde difficile erit illum scopulum cuitare, ne scilicet unicæ arti duplex finis adscribatur.

### V.

**D**efinitio Platonica Sanitatis, quæ definitur, Sanitas esse concordia, & commoderatio inter Animam, & Corpus, reliquis omnibus, quæ adhuc habentur, est præferenda.



## VI.

**R**ationes, & argumenta, quæ solent adduci ad quaternarium numerum elementorum adstruendum, & demonstrandum omnia corpora mixta ex ipsis constari, nihil euincunt.

## VII.

**C**orporum inflammabilitas non exigit necessario alicuius substantiæ vinctuosæ, vel sulphureæ mixturam, cum videamus corpora quædam omni sulphure destituta, flammam posse concipere.

## VIII.

**T**emperamentum ad Iustitiam, cuius basis est medium Geometricum, solum quoad mixim, non quoad crasim admittimus; Temperamentum verò ad pondus, velut quid commentitium, & imaginarum prorsus rejicimus.

## IX.

**H**umorum nostri corporis non minus certus, ac demonstrabilis est numerus, & temperies, ac elementorum quaternarius cui innititur; Tota enim cruoris

massa innumeris scatet particulis, vt salinis, acidis, austeris, muriaticis, & similibus, quæ ad vulgatum humorum numerum referri non possunt.

## X.

**C**Um de spiritibus doctrina apud Medicos valde dubia, & incerta sit, dum alij Spiritus in suas classes distinguunt, scilicet in Naturales, Vitales, & Animales, iuxta triplicem quam supponunt facultatem, Naturalem in Hepate, Vitalem in Corde, Animalem in Cerebro; & alij vnum tantum spirituum genus admittant, Vitalium nempe ad dirimendas huiusmodi controuersias, omne prorsus spirituum genus probabiliter tolli potest.

## XI.

**Q**uamuis apud Medicos nihil sit magis incertum, quam doctrina de vsu partium, cum iuxta Medicorum placita, & genium, inter partes continua fiat officiorum mutatio, ita vt aliæ ad viliora ministeria deiiciantur, aliæ ad sublimiores gradus euehantur; Attamen Hepatis usum statuimus, vt sit Vasorum fulcimentum, non principium sanguificationis, sed bilis secretionis; Lienis vt sit viralis fermenti Promptuarium, non fœculenti humoris receptaculum; Vesicæ biliaris, non vt bilem ab hepate recipiat, sed ab Arteria Cystica receptam bilem

9

lem partim ad Hepar, partim ad intestina transmittat :  
Ventriculorum Cerebri, vt sint mera pituitosæ mat erig  
receptacula, non spirituum animalium Officinæ.

## XII.

**C**or nullam habet super cæteras partes principatum,  
sed potius est Organum seruire circûlationi sangui-  
nis destinatum, ità vt supra sortem Musculorum non as-  
furgat.

## XIII.

**N**on minus euidens est moueri sanguinem circulari  
motû à corde per arterias, & per venas ad ipsum Cor  
remeare, ac euidens est in magno mûdo moueri & pro-  
trudi aquâ per ductus subterraneos à marivsq; ad ex-  
tremitates montium, & per flumina super terram ad ip-  
sum Mare remigrare; In huiusmodi motu circulari vita  
nostra consistit, cum tamdiù vita perduret, quamdiù cir-  
cularis motus seruatur.

## XIV.

**A**rteriæ tunc dilatantur quando cor constringitur, &  
constringûtur, quâdo cor dilatatur, sicuti dilatan-  
tur quia implentur, non implentur quia dilatantur.

## X V.

**P**ulmones non mouentur propria, virtute, quare dilatantur quia implentur, nō implentur quia dilatantur.

## X V I.

**M**usculorū actio propria est contractio ad suū principium, extensio vero est actio secundaria; & consequens motum alterius muscoli.

## X V I I.

**O**mniū fibrarum vsus, vt rectè aduertit Falloppius noster, est contractio in expulsionis gratiam; Quare commentitium prorsus est, quod rectæ inseruiant ad attrahendum, obliquæ ad retinendum.

## X V I I I.

**A**limentum dissolutum, & a fœcibus aluinis secretum per lacteas venas deferitur ad Axillares. & exinde ad cordis dextrū sinum, vbi excitata efferuescentia ex permutatione limphæ descendētis; & bilis ascendētis in sanguinem mutatur.



# XIX.

**V**entriculi actio est alimentum dissolutio, non in aliam substantiam mutatio, quæ dissolutio fit non ope caloris, quæ in hoc opere se habet solummodo excitatiue, sed ope acidi fermenti in illius parietibus congeniti, non per vas breue ad ipsum transmissi.

# XX.

**D**ilaſtole est prior tēpore ſyſtole, quare Cordis motus, cum primò vita incipit, dilatationis est, postmodum conſtrictionis, sic primò, deſinente Vita, ceſſat ventriculus ſinixiter a ſua cōſtrictione, exinde auricula ſinixtra, poſtea, dexter ſinus, & vltimò auricula dextera à dilatatione deſiſtit, vt hoc pacto in eodem principio, a quo vita deſumpſit exordium, in eodem quoq; deſinat.

# XXI.

**A**dmotum, & ſenſum perficiendum non eſt neceſſarius itus, & reſitus ſpirituum animalium, cum ſine iſtis poſſit animal moueri, & ſentire, abſque eò quod ad imaginariam ſpirituum animalium miſſionem, & remiſſionē ſit conſugiendū. In humano corpore licuti, & in brutorū corporibus, non ſolū partes ſolidæ, & claſſe, vt caro oſſa, &c. ſunt animatæ, ſed etiam partes fluidæ,

vt sanguis, & latex nervosus.

## XXII.

**C**alidum innatum, de quo tot admiranda prædicatur, cum potius fingatur, quam demonstretur quid sit, probabilius est posse referri in ipsum sanguinem, & illius motum, ita vt tot opera quæ calido innato tribui solent, soli sanguini adscribi possint.

## XXIII.

**V**T hominis generationem ab Ovo, vt dici solet, repetamus, non secus fieri illius generationem affirmamus (sicuti, & pariter omnium viuentium anima vegetatiua, & sensitiua) ac sit pulli formatio in Ovo, ita vt omnia viuentia non nisi ex Ouali primordio ortum ducant.

## XXIV.

**M**ulieres vero semine sunt destitutæ, & corpora illa, quæ ab antiquioribus Medicis vocabantur Testes muliebres, nil aliud sunt quam fæminarum Ovarium; Non defuere tamen insignes Anatomici (inter quos Fallopius noster) qui in testibus mulierum negarunt, se verum semen vnquam obseruasse.



## X X V.

**F**OEtus in Vtero formatio nō fit ex semine, ita vt ex illo, tamquā ex materia, prima ducantur stamina partium, quæ appellantur Spermaticæ, sed solummodo a virili genitura fæcundatur mulieris Ovarium, vel per contagium, vel per odorem inspiratum; quare Castorem, & Pollucem ex eodem ouo prognatos, non prorsus fabulosum est.

## X X V I.

**L**Ac ex portione Chili ad mammas per lacteas thoracicas delati, generari magis probabile est, quàm ex sanguine.

## X X V I I.

**C**Ausa efficiens structuræ, & organizationis humani corporis non in nudas, & mortuas qualitates, nec in plasticā facultatem animæ matris referenda est, sed in solā bonitatem, & infinitam sapientiam Conditoris, qui noscens, quales esse deberent animæ immortalis operationes, ipsi propria, & apta fabrefecit instrumenta; Cum Galeno itaq; sentiendum, nō esse tale animal, quia tale, & tale habeat instrumentum ( vt Leporem esse timidum, quia fidat velocitati crurum, quemadmodum

vol.

voluit Anaxagoras) sed habere talia instrumēta, quia talis esse deberet illius natura.

## X X V I I I.

**H** Vmani corporis pulchritudo, quę in partium symmetria, & proportionē consistit, multò maior est in partibus corporis internis, quam externis, sed illa non nisi oculis mentis contemplabilis est; quod si huiusmodi proportio innotescere posset, ut ait D. Augustinus; In interioribus quoque disceribus, quę nullū ostendāt decus, itā delectare pulchritudo rationis. Vnōmni formę apparenti, quę oculis placet, ipsius mentis, quę oculis vititur, præferretur arbitrio.

## X X I X.

**Q** Vamuis comuniter triplex morborum genus constitui soleat, scilicet in intemperie, in mala cōformatione, & in soluta vnitate, vnicum tamen ex Hippocr. doctrina sustineri potest, scilicet in soluta vnitate.

## X X X.

**E** X eiusdem Præceptoris Sententia omnium morborum internorum causa immediata, & vera, est humorum à reliquis, a quibus contemperantur, secretio, & dissociatio.

Ab.

X X X I.

**A** Beadem humorum secretionem, & partium eiusdem naturæ accretione fiunt maligni morbi, cum nulum Animal sit in quò non lateat aliqua veneni portio, vt patet in humano morsu.

X X X I I.

**C** Alor non est febris constitutum, sed quid posterius, & illius productum, immò licet vt plurimum calor sit febris signum, non est tamen signum adeò proprium, vt alijs affectibus non sit comune; hinc in curandis febribus circa calorem frustra, ac sine vllò fructu insudant Medici.

X X X I I I.

**O** bseruantur in praxi febres algidæ, quarum essentia, in frigida efferuescentia consistit, ex quò magis roboratur opinio, febris essentiam non esse in calore constitutendam.

X X X I I I I.

**S** ola Pulsus præter naturam frequentia non arguit febris præsentiam, vt mirari subeat, quomodo nonnulli

li pro Pulsistis se apud vulgus venditantes, tam audacter pronuncient, se posse ex solo pulsu, febrium naturam, & differentias pronuntiare.

# XXXV.

**F**ebrium in genere satis antiqua diuifio est in febrem Symptoma, & febrem Morbum; Recentiores symptomaticas tollunt, & febres omnes essentielles adstruunt; Nos cum Diocle febres omnes symptomaticas esse affirmamus.

# XXXVI.

**S**anguinis missio quamuis sit febrium remedium curatiuum, non est tamen illarum præseruatiuum; sæpius enim celebrata Phlebotomia reddit homines aptiores, vt à febribus corripiantur.

# XXXVII.

**P**ro recta febris malignæ curatione non satis est cognoscere aliquam in humoribus subesse malignitatem, & quodque alexipharmacum indiscriminatim adhibere, sicuti non satis est nosse fuisse alicui propinatum Venenum vt conueniens adhibearur antidotus.

## X X X V I I I.

**P**Estis essentia, quæ communiter ad qualitates occultas refertur, satis commodè explicari potest per acrimoniam salis volatilis, qui sanguinis acidum corrumpat.

## X X X I X.

**D**Vo apud Medicos prædicatur magna remedia, Sanguinis missio, & Purgatio, quibus tertium addi posset, scilicet opportuna ab eisdem cessatio.

## X X X X.

**S**implicia medicamenta sunt semper præferenda compositis, cum ostendat experientia quales ex rerum permixtione ad inuicem excitentur efferuescentiæ; quare iustissima est Plinij in Medicos suorum temporum querela, propter medicamentorum inexplicabiles mixturas stomachantis.

## X X X X I.

**M**edicamenta electiva, hunc potius, quàm alium humorem purgantia, sunt merum Medicorum ad Artis ostentationem commentum, cum indiscriminatim quemlibet

libet humorem expurgent, prout magis, vel minus irritât, hinc essentialiter non differût Emetica à Catharticis.

## XXXXII.

**M**ultorum medicamentorum, vt alterantium, & bezoardicorum virtus pendet potius à præconcepta opinione, quam ab vlllo sensibili effectu, qui ex diuturno illorum vsu appareat; sic nonnullorum ex ipsis adeo familiaris est vsus, quamuis sine vlllo fructu, vt mirum quomodo tanta suppetat illorum copia, veluti sunt lapis Bezoar, & oculi Cancrî.

## XXXXIII.

**D**iffert toto cælo Virtus totius mixti à Virtute partium, quæ ipsum constituunt; sic falsò supponitur, quòd spiritus, sales &c. eandem virtutem possideant, ac illa Corpora à quibus fuerunt extracta, vt faciunt ij, qui pro curanda scabie spiritum Sulphuris exhibent, eò quia Sulphur sit scabiei specificum remedium.

## XXXXIV.

**I**n sale (quem Plato in Timeo Deo amicû corpus appellat) omnium medicamentorum virtutem a summo Opifice fuisse positam Autopsia Spagyrica satis luculenter ostendit.

ostendit, vt disputandum non sit, quænam medicamenta præstantiora sint, Spagyrica, an Galenica.

## X X X X V.

**V**Enæ sectio indicatur a sola plethora, cum non sit excogitabile quam vtilitatem conferat in cachochymia, in quo grauitèr peccatur à Medicis Philematicis, qui in quolibet affectu venas exhauriunt.

## X X X X V I.

**R**Euulsio per venæ sectionem post inuentam sanguinis circulationem tantum perdidit dignitatis, vt vix locum habeat in Medicina.

## X X X X V I I.

**E**amdem sortem experta sunt multa alia medica præsidia, adeo vt noua, & exacta methodus medendi ad legem circulationis sanguinis sit exoptanda.

## X X X X V I I I.

**S**ecundam retentam post partum posse ad multos dies intrâ vterum detineri, ita vt nec mors sequatur, nec Puerperia supprimâtur, non solum ratio sed etiâ quo



tidiana demonstrat experientia; quapropter magis tutum, & sanum consilium est illam medicamentis excutere, vel illius putrefactionem expectare, quam manū vnā cum Secunda Puerperarum animam extrahere.

# X X X X I V.

**M**edicamēta Cordialia, quæ passim adhibētur, nō sunt talia. quatenus cordi succurrant, sed quia statū sanguinis restituant, vt aptior sit ad circulationem, ipsum vel nimis adstrictum soluendo, vel nimis solutū adstringendo; Quarē potius *V*italia, quam Cordialia sunt appellanda, cum vita in sanguinis circulari motu consistat.

## L.

**P**ostquam tot eximia experimenta oculis nostris exhibet Chymia, turpe est, ne dicam Medico indignum ad antiquum ignorantiaē Asylum confugere, scilicet ad occultas qualitates, quotiescunque alicuius maligni morbi essentiam, vel symptomata explicare conueniat.

*Datur omnibus Arguendi locus.*

*Imprimatur,*

Vicarius S. Officij Mutinae.

*Vide,*  
Ioseph Sogarius.

2 1665. 9



MC

